

MISS LO SUPER-RETRACH MARVEL

Adiu los pitits ! Un còp de mai, lo Capitani Lemosin vos ven parlar de son repaire secret totjorn ‘catat au mitan dau malhum de galariàs que s’espand jos la vila de Limòtges. Queste còp, vos convide a descubrir ma novela rubrica : lo super-retrach. Vos i presentarai lo superjòune de l’annada. E per queu prumier rendetz-vos farem la coneissença d’una dròlla qu’avez benleu desja crosada dins una seria en 2022 mas que tòrna en 2023 : Miss Marvel !

Nascuda a Jersey City dins la Nuòva Jersey, Kamala Khan es una dròlla musulmana de 16 ans, d’origina paquistanesa. Son frair es plan conservator, sa mair a paur que venha gròssa per çò d’un dròlle trop ardit e son pair vòu que venha medecin. Au liceu, sos amics son Nakia, filha d’immigrats de l’Asia dau Sud coma ela, e Bruno, d’origina italiana, emb lo quau partatja la passion de la seria *Las Tortujas Ninjas*. S’enamora de Kamran, un jòune que li apren a menar. Fan incondicionala de Carol Denvers alias Captain Marvel, a lo poder d’eslonjar son còrs. Per exemple pòt agrandir sa man per sauvar Zoe, la filha blonda e populara de sa classa que l’agaça mai que mai. Segon las fonts (seria o comics) sos poders venen d’un braçlet eretat d’una reirgranda non-umana o de son passatge dins una bruma terrigena.

Sas creatritz, Sana Anamat e Gwendolyn Willow Wilson, totas doàs musulmanas e originàries de la Nuòva Jersey, volián crear un personatge que permetriá a totes las dròllas de s’identificar. Sana Anamat fuguet confrontada au racisme antimusulman dins sa jounessa dins las annadas 90 e voliá presentar un personatge musulman positivament, per « que la prochana generacion coneissa pas queu tipe de reget d’identitat ». G. Willow Wilson, ela, li voliá pas balhar daus poders minhards e luquetejants mas quauquarren de cinetic, bizarri e amusant de veire. Tanben voliá quauquarren de liat a l’adolescència. « Nos sovenem tots d’aver ‘gut 16 ans e de pas nos sentir a nòstra plaça dins nòstre còrs. Aver daus membres que frotjan a daus ritmes diferents, qu’es un combat au quau nos podem tots identificar ». Qu’és tanben sas aventuras que corresponden a la vita d’una jòuna d’augei. Deguet trobar l’equilibri entre sauvar lo monde emb los Avengers e estudiar, veire los amics, complir sas obligacions familialas tant coma vautres devetz far emb lo liceu, l’espòrt o la musica, los estagis mai los pitits trabalhs de l’estiu.

2022 fuguet l’annada de Miss Marvel. Disney surtiguet una seria sus l’eroïna emb l’actritz canadopaquistanesa Iman Vellani dins lo ròtle principau. E sas aventuras contunhan dins lo filme *The Marvels*. Panini Comics ne’n profechet per tornar surtir quauques comics. Entau la podetz retrobar dins la seria *Marvel Next Gen : Ms Marvel* (dos tòmes mai un fòra seria) e dins un tòme de la seria *Marvel-Verse* que li es dedicat.

Vos soate de passar daus bons moments de lectura o davant un ecran beu o pitit en companhiá de Kamala, e mai de segre las aventuras d’autres superjòunes !

Venir gròssa : tomber enceinte / S’enamorar : tombar amorós o amorosa

Reirgranda : arreir granda mair / Bruma terrigena : substància gasosa produchida per daus cristaus dichs terrigenes e que permet aus Inumans de desenvolar daus poders

Minhard : brave, simpatic, mignon / Luquetejant : belujant, estelejant, briulant, étincelant